

四庫全書

集部

欽定四庫全書

雙溪集卷五

宋 蘇籀 撰

古律

觀胡文恭樞密全集偶成一首

鏗鉉正始音嚴密萃英耆上仁體勛華四方致雍熙
文賦鳴升平聲譽藝林馳心口爛錦繡歛唾皆珠璣
韜涵白圭玷揮灑清風詞興寄擴無窮標望擅一時
聖主逢嘉祐兩府皆龍夔豈應獻納際造次差毫釐
百爾賢佞

評卓絕公是非獨無許郭術人實不易窺東阿昭明惜
貝錦尤疎紕猶子後來傑元祐叅丞疑蟬聯龔龔龔孫
舛聲華飛婦韓外曾裔稚子甥曰彌撫編可勝歎綴緝
刻棠梨定評楊謝公遺芳六一碑

送李舉之武博學宏詞

稷下機梭纂奏篇犀通木癭炳彪然盛朝耆望門庭懿
括匠宗師典據全掉鞅春闈賈餘勇賞音盟主詫稱妍
峻登名第高酬擢臺閣容儀繼武傳

擬古

六州齋榻醕分鴛誰料延平最解歌蒲阪崔姝白樓少
闔閭吳館冶容多頻煩畫戟凝薌寢輟選鸞篋插阜羅
勿俾台山洞天侶眇無劉阮醉顏酖

陪侍知府待制丈巾山高設竊聞是日賡和去
春林倅紅樓風什奉繼一首

磴鮮梯飈最上頭挈排犧象主觥籌從容北海能延客
酣適東風咏倚樓獻歲順成當大有名儒過計與私憂

仰看鳳德翔千仞總領鴛鴦也狎鷗

蒙知府待制寵和前韻又承東湖水嬉之招一

首

一聲巧囀柳巔頭半丈紅芳送曉籌天氣柔嘉收積雨
林花稠疊竦高樓七槃長袖重新製九醞空樽詎足憂
丘壑夔龍位巖石何妨紗帽對沙鷗

朱從事安詩挽詞一首

丈階王命渥馴侃洽鄉闈未俗賈三倍尤能賑百鍰宗

盟導倚闕邑落舊知潛翳翳佳城鬱鑱山殆弗刪

夏日池上

諦復春秋指袪排日務嬰嵐巒屏郡廨枿樾蔭衙城褐
父評丹首幽齋綠督經忘憂葱蒨擢伯雅燕酣醒窈窕
陽春唱鮮鹹臨海鯖惠文除擾害五百慘徒黥卷籍闔
還展錢刀斂尚輕珠還鳳儀政他日儻齊聲

公退三首

披文不釋遺編慕耽祿終慙遠賄稱劫劫抗塵非勝趣

寥寥出世有真乘轉頭值寓無窮極措足虛邪粗可勝
管晏空憂覺先物未須薄薛與卑滕

繆適康莊列大夫沈研歷久到盤盂囊餘佔畢乾螢火
家有凌雲舊履鳬般若初心依耆老參同內事靳儒臞
吐音慙訥嘗聞見邂逅周旋只小巫

缺然資略每區區抑冒揚清小小劬諏律網條思濟理
算緡公帑較輸儲三科識擢才能顯八計精研吏治孚
端有碩生如杜蕢升堂洗觶降除趨

暑雨憶衢州一絕

衣裳俎豆信華風
酒聖茶顛倚獨松
夏屋渠渠聽驟雨
數尋竹外瀉琤淙

送滁守蔡瞻明提舉

史家汗簡編年垂掌武
集賢籌政機君侯祖烈冠前世
內外貽厥真天資景靈審象丹青炳端靖
顯昂席慶基
浙港之東蚤乘驛卓爾羣吏諸侯師云何士元淹驥足
留滯太史周南維淵源濡染由所自甚美而度多文詞

猗歟兩祖揭二柄電凸騫翔天下知奈何恬無進擢慕
鉤引吹噓衆力微冷煙橫雨秋濤外滁邦山水停一麾
貧交摻執空里蒼截輦那復留驂駢氣宇前修令儀範
才具時儕高品題綠綺尋驛醉吟操清流感慨神武遺
側聽褒嘉最郡課水衡促召夫何疑車輪繼斲心自了
桑榆稍收宜赴時珍嚮高標警衰鈍鄙哉不敢多陳詩

趙和叔大夫母安人曹氏挽詞

風規王邨韻筮醮相夫賓逸子大家懿弄孫東第新百

能知肖嗣八十又三春
磬石無虛勒筭玃不復晨

壬申春雪一絕

長天頓改楚雲容
初夕依微後攪空
點綴柳條紛若絮
未妨梅蘂銜芳叢

龍井僧全示寄庵樞密程公累篇季丈弟新什
求余繼其末一首

程蘇中興什同庵有後前前朝沙門首辨淨超卓然者
宿失聞聰飫參餘小全龍泓風篁獻荏苒二十年緇儔

幾換易巖壑宜變遷亭亭百歲杉泠泠九淵泉梵音擾
龍性玄解忘魚筌有客輦瓌詭無情施繒錢佛法佇隆
興般若須人傳更令觀刹麗但俾子孫賢三空正覺路
一喻實相圓不替人天師重新演教禪

武林春日一絕

薰膏佩服尤瓌靡聯踏春陽特銜骹十里青樓玩芳月
西湖並舫恣娛遨

勉旃一首

歸一豈應無以返要言湛諦滓於淘大知直截揣摩漸
積執冥迷厭離勞目睫古人曾致論根塵當念勿喧囂
主張名教殫才智王霸蟠煎火上膏

秋冷一首

嵐煙澹澹雨颼颼殘枿折槎陂水頭贖爾典裘扃戶牖
饒伊夾幕閤娟柔蒼蒼塵肆斗牢落淒涼窮途強釋愁
箬下浮君霜露旦豈應虛詫釣詩鉤

漫述二首

理窟孰宗趣卜居忘市闌紆餘力分裏梗概智仁間導
引非茫眇耕樵未擬閒寅緣任俚俗及物念痼瘵

跣趺圍褐越雞晨灑落生緣治水薪一藝湛酣任疎放
百家雜揉識疵醇春炊斷斷西疇穡書記翩翩東郭颯
飄兀籃輿絕畦畛莽蒼更訪隱湛淪

春設一首

折簡王春涓勝日執輿鄰曲集僑官奕娃紅手凌寒怯
歌頸塗薌訴白寬膏沐柳梅牽屐齒冶妍桃杏壓欄干

珍烹鬪賽攜英黠娛老粧樓疊肉槃

惜花一首

豁眼桃紅思聖解襲人蘭郁比脩能面脂靡曼負塗澤
繪綵化工夸斲冰舊榮芳穠觸吟境艷陽風色嗾狂朋
傾壺簫管鬢蓬髻沈頓金觥電凸稜

何會卿婦清河張甥挽詩

常念注西竺浮生付六如良人愴中饋二穉未勝裾
黨技紅淚鄉鄰臨衆車金花它日誥封號表松檟

閒詠一首

肆筵無釳器釘壁但鑱碑慨歎慕前躅咨吁亦小知
飪諧棊酒伴餅遠井泉湄自許羲黃上陶然絕曠夷

故孺封曹氏挽章

豪宗相承籍遺懿本馴良夫息遵慈庇汙萊化阜康
盃圈留燕机丹篆勒陰堂愈愈垂青紫詵詵慶祚長

春集僧舍一首

繡川藻野銜媽妹練縞穠殷亭育鑪二月峭寒輕抑勒

宗朝和氣畢昭蘇紺青六幕無纖翳綠縟多疇幾町區
居士自攜三昧醞緇流叢錯設伊蒲

蒔蘭一首

湘纍鞞佩南邦媚天女襟期絕世薌藝植便應彌九畹
孰知苓藿與簷糖

炎夏即事一首

五詠八吟鑽古奧四豪六逸共周旋隱囊墊幘抨碁局
輕簾珍筍蔭採椽習氣崢嶸談在昔知音推激互相然

至哉佛老儒宗外聖諦永銷濁火煎

娛老一首

多聞內殖每瞻烏枉把春秋問蟪蛄俗瑣未拋聊爾爾
古心內驚亦區區繫匏於越壤田薄雙鯉銅梁僕賃痛
掄白追游味殊寡所圖榮綺訪仙臞

塵居一絕

天碧綃幃障鐵牛塵居煩促遠林丘
赫炎熾景烘煬竈
悵望金甌玉露秋

重陽一首

籬根金色小正時
醅熟風高與節期
耿耿挑燈聞夜誦
忽忽刈穗飫晨炊
閨娃屏藥香盈把
朝士茱萸酒一巵
蓋世英雄健天下
感秋應待羽觴治

山行入寺一首

執輿入輦屢痿幾
陟險山農笑却時
屐齒未常先雍老
輦飛久已見薨楣
磴扉百步猶流汗
觀閣三休豈易追
浪漫悠悠一雞肋
角巾東路最平夷

近市一首

摩肩躡足吁屠販接衽駢顱全馭筭巷隘姑名為小隱
賓佳不必有珍肴龍鍾游宦如投耒瑣屑僑民一繫匏
丘索典墳心跡遠煙埃咫尺自喧湑

酬飲一首

珠零醇碧郁春槽矯首梅林酬自陶橫梁未應隨李廣
團詞亦足擬王褒俯從觴詠山陰楔遙說笙篳錦里遨
取次難論禦戎策宜知鼉鰲鱸鯖臊

春晴一首

高槐湯餅排朝饌嘉菊香蒹菼羹餉早趁墟樵壘計
澆春量腹聖賢并無由屠嚼相親就宜詭竒章侈大烹
飄忽紅稠鶯燕語康衢治服炫春晴

往日

往日承承孰為裁誠能俾人固當諧豈云小辯能迴幹
際遇長才力洽該大塊慘舒噓翕頃元明迷喻唯阿開
斗南必有圓機士安得一樽陳此懷

稽山漫作一首

三餐佚豫年其有一醉陶然日不貧發議詎堪登臚仕
費貲端為速嘉賓屢空蜀信匱囊藥稍傲越吟追里鄰
劉白殊無記人句奇章高設豈應頻

誘學徒一首

瞥聞立覩且湛研計索思臧義理穿剖析賴經宗匠手
絕羣羞拍腐儒肩鷓鴣嗜鼠額門蔽博簏忘羊失路偏
警策後生文憲種若為準擬即真賢

編聯偶作

耽飫神奇致思研理趣幽崎嶇由考做勉勵似鉏耰明
耀鑑頻拭醇精酒屢酸編聯存隻字解悟失金牛曷可
裨宏議于何荅彼諏達辭宜駕說典學善宣猷渾渾窺
姚姒專專切旦丘時王資粉澤天匠不雕鏤愍惻元元
意彌綸色色優雅馴鐫鄙固切實忌飄浮自古英莖肆
于今都市謳近誰臻壺奧遠孰擅風流壹鬱窮居氣荒
唐失友愁湛酣及醲郁浸漬復優柔斐綺資吟嘯蕪枵

寡晤疇不為傷手斲無取強顏羞管氏攘戎索元龍高
卧樓激昂牽老憊書劍判悠悠

舊游一絕

慨悵秦關舊儕侶綾袍鞞韜火鑱囊南來放馬遵舟楫
鱸鰕西風號本鄉

嵯邑周幹辦挽詩

嶷然衷塞懿挾操亦人難唱第芝庭瑞背城逋寇殘傾
殫副王命疇曩入貲官遺事鄉評著嘉言邑里寬

酴醾一絕

梅醖蘭氤芍藥清
旃檀婆律萃天馨
試開秦趙當年目
何藉珠簾翡翠屏

題劉紫微貢父公是集一首

惆悵欒城舊朋執
何殊闕里孔顏徒
達生自信誠知命
晚節遭逢德不孤
貫悉該明漢中壘
雍容通雅蜀相如
老成流輩方吹薦
典訓斯文示後儒
疏奏襄陽正平手
表章天策伯襄俞
明窗渠几一呻繹
背癢政逢長爪姑

仲秋苦熱半格一首

老火薪熬鼎竈然柔金低伏聽燔煎虛窗疊巘攢三峒
冷枕清飈直萬錢俛仰生涯恃林井已纏冠紱哂觚甌
朝蠅夕蝸嗟何集山雪河水渴沃前子夜涼生秋思肇
午時炎熾赫羲鮮蔭饒華桷單絺叟嬉愛清川泳月船
巾幘垢氛勤澣濯菓肴剝剝萃新妍芸夫望望瞻雲漢
鉦鶴聲聲唳碧天瀑水何山千尺瀉洗心安得賞懸泉

晚秋一首

曩間夏歷標花候粗爾陶中漉酒卮倣擬塵編談世諦
何人才力趁時機

潘令度求厥弟令表挽章一首

婉孌標儀賦了聰優為郎位奉車童蘊奇處士未王命
好事儒流昵德風姻援烏衣門闥峻款游騎省志懷同
克家致孝鍾全美鳳羽飛翔宜待封

藥褚吟一絕

玉禮丹砂寶易知蛻螻蘇合粗擎齋國醫本草加繁悉

異域琛來獻麝犀

雪齋即事一首

熾炭雪窗塵簡編慵偎毳被藉麈氎
夕晨呵筆冰膠研
乙夜橫琴凍折絃
郁郁烹鮮具
羹夏浮浮炊餽
忍饒涎
粥薪清爨庖丁粗鼎俎
逾時不解羶

元夕偶成

里唱塗謳饒吹轟軟塵
梁苑記前生
寶珠穿蟻嬉游肆
蓮藥然犀不夜城
透盃燈繁人畫繡
隔羅光醞酒澗清

春娃環舞雲階隘邦媛鮮粧月地行

送芍藥者一首

披猖二十四風花淑美豐融殿百華界付碧莖頽粉藥
薰裁溫馥疊鮮葩無言似笑詩魔惱比韻侔嬌女艷加
壯歲逐春心欲謝酥煎靡麗遠泥沙

古語

袈裟匪意稱居士饋橐誰家號智囊
鵝戾青雲莫吁訝鵬逃炎熱利深藏

寓言一絕

輜眇宣任勝婦職春暎桃蔭未敷蓮月娥宮額噫神護
旖旎仙舫託使旃

呂偉信求冰花詩賦得兩絕

霰集栢杉霏霰鬆瓦冰鐫畫葉柯葩密移栽化鍾纖巧
梁苑詩盟斲句佳

墨迹扶疎凍未消奇蹤印紙鏤刊雕花宜道韞吟鹽絮
壓倒劉叉冰柱謠

樓樞密挽詞二首

決科騰踏無前勇，比牒聯飛第一流。
召直毫端準謨誥，甄評皮裏韞陽秋。
槐班鼎輔膺榮東，玉陛封章究遠猷。
楚挽淒酸洩遺恨，栢臺金殿望隆優。

岳鎮巍峩幕府雄，紫青願旨稟趨風。
布宣條目都無擾，求瘼慈祥縣所蒙。
賓位樽罍人事改，影娥花月畫堂空。
諸方故吏多才藻，撰紀徽嘉篆刻豐。

絕句一首

雙紋八尺展雕床蓮艷方空夜玉香雅秀冰姿延閣彥
豈應簪斷作淒涼

白菡萏一首

嗟兮容曠世冰膩郁妖紅姑射非無偶能言諒不同

潘卿求內主令人挽章二首

擇夫先筮嫁年俯逮期願周南弗牆面班誠克刑儀陔
蘭冀豐養中饋失扶持惻慨百金誅君文亦漢碑

戾戾思舊苦月缺白毫光孝懿綽馴習德音寧詎忘委

禽流慶衍偕老誓言荒肖似傳孫息綢繆卜鳳皇

王季海求父宣義挽詞二首

繕性克知命鄉評行實尊傳經拾科第綵服匝庭軒
萼專方面良弓補諫垣金坡振詞筆品藻不勝言

里仁巾几寂遺懿滿瞻聽濟美珪璋質流芳琬琰銘
紙灰霏似雪蒼泣洒將冰念念存伽釋超超拔九冥

陳緯男求厥父挽詩二首

閭室良規範萱堂子職修儀形儼惇碩積習肖風流疇

曩鄉鄰援悽涼川逝愁太丘純豈弟慈愛理能周

克家宗從譽澗屋竹林庄情話非前聽門庭付令郎短
生風燭頃遠日隴丘傍紅粉祠堂壁亦應鐫短章

潘令度送牡丹絕句

劇美溫馨逞環媚膩紅殷紫疊重臺芳晨華月臨春閣
倚麗凝嬌豈易栽

輩采若求厥父令尹德秀挽詩

東魯懷經慕先哲齋房僻處盛門徒勉陪流寓推鄉校

優選文華慶仕塗議獄蚩氓生活路
削鋤姦軌亟揚枹
遺編亶亶垂儒典濟美弓裘後世模

雙溪集卷五

欽定四庫全書

雙溪集卷六

宋 蘇籀 撰

賦

牡丹賦

河洛之神權輿此奇何夜半之有力刻朝新之瓊枝麟
角鳳觜之續不足以爲固投觚削鐻之割不足以爲機
砂點鐵以成金青出藍而過之何造物之鉤距蓋三昧
之密施候琯裁動枯枿先知巉然擢珊瑚之短鬱然飲

沆瀣之滋無握苗以助長忌蚤華而中衰藁幹漸老開
花及時揮瓊尺以裁霄縷金鈿而鏤衣襪未了而半就
情欲吐而猶疑發精神於雨露借光氣于虹霓鳳翾羽
而初下鶴歛翅而未飛如誤入于金谷似隔沿于薜溪
候晨光而潔鮮怯午景而低徊初含喜以濃笑忽微怒
而自持繚以畫欄障以羅帷暗淡月采空濛煙霏有美
一人艷無等夷縹眇金菊之裳嬋娟蛾綠之眉若夫紫
殿龍樓金臺彤池封黃蠟以入貢乘汗血而絕馳天顏

一解四海光輝念其向日遠過蜀葵太平佳瑞許配靈
芝至於箕潁之間林下水湄曄乎滿目野夫所窺我方
鐵石其肝膽枯槁其形儀豈造物之見試視綽約之妍
姿為汝一笑而引滿心亦無成而無虧

湯泉賦

陝西南坤泉滂山澗崖谷焦烈袞沸奔猛湯池烝霧騰
寫浩汗客曰異哉水在萬物其性必寒胡然鬱攸無事
燒燔草木爍爛鳬鴨煨燂匪為澄泓而後可探詰其從

來莫克考原余蓋知之易有太極是生兩儀風金火輪
世界執持火光生於巨海波濤湧于汀岸鎔石成水敲
石成焰三伏炎曦溫暾河漢百井隆冬其氣自煖吾儕
習俗淪溺情見煮鼎負薪而後晨爨欲窮理而盡性至
中和以推原徇耳目之尋常昧造化之機闕是猶火鼠
不信冰蠶也石中之火火中之泉坎離相濟為湯固然
此山岳之仁氣慙寒士之枯朽假溫慈而惠和以洗浣
其塵垢使於斯而產金玉終何益於野叟惟荒山與亂

石無華堂與瓊甃免汙亡國華清貴妃嫵婉之求無取
於斯予槁項黃馘短髮威蕤青鞋直趨老櫛自隨頭輕
目明彈冠振衣詠而風乎配魯之沂

二松賦

商邑巖巖羣山環中膏液外湊英靈內鍾其人黃綺其
植曰松翹翹我室契闊朋從二友忘言冉冉秋冬古之
遺直本鉅末豐尺寸非可較量繩纏非可究窮凜凜乎
其可嚴憚也如見大賓如承大祭形魄竦動圭璋昂顙

矯矯乎其能厲操也如首陽之二賢齊魯之兩翁石忘其堅山失其穹確乎其不可拔也如辭位之太伯邈乎其不可攀也如憂世之元龍炎曦鬱攸金石銷鎔冰合九河雪屯萬峰毛髮磔磔不改聲容如藺子完璧怒髮冠衝睢陽蔽江張髯乘壟天籟嗥鳴非鼓非鐘生三伏之栗冽時一警於昏聵若洞庭之樂鈞天之奏均節跌蕩他樂莫同斷而支太室之壞輯而營靈臺之宮如良弼之用捨係此邦之替隆雖然待雨露而茂遂積歲月

而強雄世俗尚得而企仰蛇鼠謬託於蔽蒙孰知其筋
幹鱗甲非特據地而摩空猶龍變化乘雲高蹤排陰助
陽追日迴風超乎六合之表出乎造化之工遺琥珀與
茯苓貽俞柎與倉公嗟夫世人欲速種柳與楓菌生朽
壤蔓延楚叢惟二友之不凡受正命于厥躬相與吟歎
而作殆其莫逆于胃

閩嶺賦

習被卉而用夷兮極東南之海山歎造化之瓌詭兮想

禹績之艱闕降丘坦其郭郭兮曰無諸之市闐步窈窕
經崎嶇兮獲清穹而考槃陟越王之宮址兮與昇鼓之
孱顏惟此山之體既合別而貫屬兮又競爽而叢攢蔽
虧日月兮橫掛斗參臂趾根蘖兮插萬仞之海瀾上下
左右兮夷傾峻彎如削如染兮奔峭多端惟此山之氣
飭耶燔耶兮迫之難看乍彤乍黑兮紛郁蒙覆颼氛梅
靈有闔闢兮霍然霧除園顧而巘岈惟此山之德陰谷
冥冥崇朝多雨兮陽坡萋萋綠縟而難刪孕產金玉兮

棲集龍鸞屏鴝却蜺兮庶類以安惟此山之陰天作百
隘虎落吳楚兮盜攘罔干地脈絡而無憾兮海不能以
益寬惟此山之人秦漢蠻夷兮近世衣冠未暇念夫廬
阜兮每帽欹而足酸惟此山之望鴈台嶠瀧邪界連延
兮潮汐噴射撞水裔之堅頑鯨鯢瀕洞兮渤澥瀾漫掉
心駭目兮闕視縱觀惟此山之游倍於吳蜀競丹刻兮
招提剎竿輪奐千所兮敷譯經教架壑而冠巖洪崖洞
穴兮天設神剏噫達人之既逝兮有往牒之未刊俛仰

談笑兮木杪雲間搜奇踐勝兮領略莫殫其石很怪兮
嵐薰而薜班蹲象舞馬兮麋麇踞蟠其泉清冽兮竅竇
瀉湍泄乳停膏兮淙琤佩環萬斛沸袞兮濯浴體胖其
果珍異兮荔蕉黃柑地不愛寶兮填谷映巒其木攬錯
兮松桂楠栟千尺離奇兮龍起熊攀榮耀隆冬兮時令
犯妍箭茸晻靄兮翡翠纓縵射干薜荔兮美箭檀欒被
覆緣連兮蕢荈萸蘭吮吸唱嘽兮天籟自譁啼歎吟喁
兮嚶嚶嘖嘖煩形色聲味山靈千變以娛人兮逃虛而却

其神姦嵐光著于眉睫兮清賞痼于脾肝嗟此邦人兮
縮衣晏飧南畝萍布兮田毛實慳蕉林芋區兮蕭散江
灘水流通川故居之而不疾兮交鑠鼎鬱故隆暑而微
寒屈宋未嘗錄兮班馬非所般臨狹歆側兮吁嗟永嘆
濟時利物兮雲擾大艱救焚拯溺兮君子不閒引領浚
都兮恨無羽翰石髓暫遇兮金丹一鑽白日清天兮孰
曰到難

雪堂硯賦并引

伯祖父東坡先生琢紫金石為硯圭首箕製寔雪堂中
形範卓豁鴻筆鉅墨寬然運而有餘先生以遺先人此
研與詩書並藏于家子孫不忘遭亂後不知所在僕憂
患餘生悼失故步北苑鳳咮山溪石先生所謂勝龍尾
者因命工採斲復為斯製庶幾乎不失舊物也嗟夫所
以記錄遺書軼事傳君子百世之澤點黜殆非復世俗
器矣乃作賦曰東坡先生入道窮微曠聽婁視不貪之
寶不鑿之智輔物理之自然廓無心乎數外發為藝學

舉世莫二契聖哲之奇韻示名教之樂地窮于黃岡斷
石為研底滯聱牙發明不厭皁白經緯箴規忘倦窮易
之剛柔貞悔盡詩之興觀羣怨原法語以折衷續盤詰
之斷爛評論銘誌幼婦黃絹波擊點畫出入英變北扉
東閣言成謨典感麟凡例之筆鑒國膏肓之砭鄰敵為
之折衝姦邪以之喪膽觀剝谿山之刻槃孟枕几之篆
揭日月於簡牘耀龍蛇於琬琰搢紳微公則聳聳吾道
非公則黯闇諷誦伏膺思見斯人斯人九原其器尚堅

不居廟廊非硯眦焉枕中之訣父子之傳裹以緹衣藉
以青氈其器羽化其制殆泯雷槌取璞月斧礪刃三郭
二趾淋漓纖穎色如青鐵質如讒鼎思公灑翰毛髮竦
凜驚古舊觀茵席之鎮坡陀瀰漫地闊海浸提耳畫一
危失先訓志一氣隨旨達詞順遺報亡弓斷絃折軫窺
乎突奧願竊繩準齟齬脫脫忽忽道聽至若葺宇廡下
施床榻上王蒙徐偃坐卧摸傲驚之鑽之誰為遠過人
更相笑僂淺叢胜拊硯三歎韜翰亦可剛健流麗融會

尾瑣問思修省老去疑情

米元暉山研賦

噫歟璋哉巒阜鐘巧截嶭玲瓏三茆九華之前後二室
五老之西東天作地寶神力鬼工矩矱然而刳綴月斧
斲於朦朧搜漱融結出乎龍宮續潤秋濤之骨靈霽春
岑之尤特見怪而何謂乃壺中之仙丘泮渌泓坻黝黯
雲浮文字之祥點黥之勛豁櫝啟幕耳目清新捫叩而
胷次隗磊賞激而肝膽輪囷雖一簣叢爾么麼老拳瓊

姿殊態庶物莫先橋中肆游於園綺耳門不帶於兜玄
邨鄆黃梁之身世此殆小有之洞天寶晉父子負能使
氣紫淵蒼壁麝煤栗尾挾此翠麓用器之瑞辟塵珍玩
凌雲高致素靄撲襟蒼霧噓機軌範相承措言屬意亭
臯隴首之章補亡正始之義驚經袂帖洛神樂毅破羌
梨橘來禽青李神明還觀俚俗一洗雄拔健峭凝情倣
效壓鄴侯之三萬得二王之祕奧慎守玉軸備禦他盜
西清珥筆承明應詔天子面試而加賚魏乎致主之有

道著聞寰中煒煌衍耀後生標楷而趨造前輩同明以
相照一聚英靈非其人而蓄峙則崖譏澗愧衆峯詆訕
今造物出奇副一門冥討明窗細氈對管簡之嗜好雲
騰泉湧好詞似之號稱墨妙時望公左右天造允王國
所珍享南山壽考有開必先此焉識兆

戲作梅花賦

夫何瓌逸之韡萼兮邈疎盪而的皪皇命姑射典司兮
先春邁倫而無匹百卉僵凍幾摧兮妙切瑳而雕刻握

宇宙之英淑兮，嗾林薄之蕭瑟。高柯喬幹，叢孽槎枿兮。
偃亞竦蟠而竒刷上苑，南轍夫冷颼兮。露槃北漬乎靈
液，素娥舒而迴映兮。青女降而邀勒，戴雪斲冰兮。攢綠
莛而盛飾，煙際愁魂九遷兮。雲表霏氛而六出，妍影照
彼漪連兮。韶光耀夫暎日，郁黃昏而倚竹兮。挽青春而
瘦劇，苓藿莫逞其芬兮。桃杏休詫其質，槩椿桀媚時而
敦。苾兮豈若龍沈雅秀，清真而溫蔚發玉氣之晴虹兮。
動賞音之嘖嘖，何促節于畫筒兮。綴俚辭乎瑣筆，或曄

漫溺于凡譜兮孔墨見嘉于正色騷人之欣會兮炳松
炬以燕秩徙倚俛仰以槃旋兮歎纖穠而妙密揀長條
以撼嗅兮忌落英之狼藉眼界信靡兮鼻觀悅適索漠
祛夫吟諷兮薰襲慰其禪寂解語西姓之妖玩兮善擲
冶名之邇昵風流數澤可遐兮溫柔鄉里宜擲夜遙遙
而冬敷兮雨絲絲而夏實商巖啟沃調飪和衆口兮曹
瞞善喻燥吻濡乎萬卒或者東風帖壽陽之眉心兮國
艷膏櫛彥士慕陸凱之流芳兮迢迢置驛面花獻笑兮


邂逅莫逆終不若補風雅之申勤兮思無邪于驪駒

靈物賦

衆萬之夥最靈黎首雕夫人知析其天守念茲釋茲聞
覲言興詰厥攸從孰尸可否特爾維綱孰俾官授稽前
靈之昭晰豈四目而兩口獨罔覺以冥行無先知而拜
扣書簾聚囊慨其姜朽統極致中刪撮伺候千里毫末
洞矚察究萬仞藏珍精進泊湊斯物竊惚鬼神懵瞽氣
質凝密自悉自受色色味味而潛夫朕兆生生形形而

不事斷剖慙六鑿以相攘或肆馳而浪走夸盱衡而形
謀窒本實之常有日用之以愈昏月違焉而奚救歲周
甲而省非力湔淘而勉懋破封執釋瑕垢深湛體研劈
析矯揉滅絕邪絲掀豁疑阜斷想忘情廓乎邂逅歲鋒
海納無表裏而洞同覆載周流汎應非洪纖而并包宇
宙慎內閉外自返而透必靜必清頤真在宥攝六籍之
高竒卓無倫而絕偶眇視軒冕顯嚴之謂不殆此之常
久於是匪樂餌歌嘏而歡捨導引屈伸而壽余喻而耽

馬字曰靈物銘諸坐右



雙溪集卷六

欽定四庫全書

集部
雙溪集卷八

詳校官石中允臣薩敏

主事臣呂雲棟覆勘

總校官進士臣繆琪

校對官原任典簿臣郭祚熾

謄錄監生臣胡騰蛟

欽定四庫全書

雙溪集卷七

宋 蘇籀 撰

表

代廣東漕謝表

乘輶江左深愧空餐改轅嶠南再蒙寵寄詔諏原隰焜
耀嶺瀧均王澤于敷天冒海隅之出日澄清任責欣慨
交并中謝伏念臣少學洙泗之濱繆習六藝老昧研桑
之妙豈悟九章龜勉金穀之間汨沒簿書之際循良尚

冀於前躅空踈誤玷於顯曹倚伏相乘顛沛失據弔影
舐犢之戚消冰晞驥之心不欲抗顏於形勢之途乃其
私願薦令悉力於均調之任休有榮光仰天造之曲成
顧人微而靡稱此蓋伏遇皇帝陛下至仁化育神智裁
成耀德振兵柔遠能邇講修舊貫初解瑟更張之時允
迪中興有思馬斯臧之富察臣懇悃素守不移憐臣踐
揚老當益壯收東隅而已晚付南紀則過優思終始以
酬恩念綏柔於遐裔殫竭計慮理財正辭撫循民夷裕

人約已敦崇禮義抑絕暴貪愛惜禹陰盡悴公家之利
傾就堯日無慙畿甸之官臣無任

嫫女謝增秩表

調發佐軍幸無闕失褒賞增秩叨被寵榮揣已何功汗
顏無措

中謝

伏念負乘致寇伐鼓追逃凡率土之王民

誅無禮於君者奮龍韜之洪毅致鼠竊之被擒州縣運
粟而濟師戎行操袂而獻俘辱在共理例陟華階愧無
奇策與異能亦錄微勞與片善示大公之渥澤用勸獎

于多方此蓋伏遇皇帝陛下功德日新智勇天錫正位
凝命賞慶刑威禁暴而生靈允懷念功而吏士用命豈
特一方之咸乂殆將縣宇以削平臣敢不激昂犬馬之
心展盡驅馳之力誓效頂踵用副焦勞臣無任

福州問候表

臣某言建炎三年十二月二十六日有入內內侍省東
頭供奉官徐珣等附海船至本州伏聞大駕以十五日
發自明州及二十九日被温州牒備准劄子聖旨車駕

權幸温州者遵海而巡蓋不獲已避狄之患厥惟艱哉
臣某誠惶誠恐頓首頓首應係官屬吏民等不勝敵愾
之心各奮同仇之誓王室之憂未弭臣子之義不遑竊
惟本路八州近寇諸隘築堡立柵募民為兵天成限隔
之牢地利金湯之固長樂重鎮行宮切鄰悉力經營祇
備巡幸臣聞通大道者不失四國克畏天者必保萬邦
恭惟皇帝陛下多得天人之信助少寬宵旰之憂勤念
生靈之厭干戈如飢渴之思飲食熟講萬全之策莫如

五餌之優更祈任賢使能據險守要致使兇渠效順亂
庶自消專務智謀徐圖興復臣無任

代建州上表

臣某言准進奏院關報大駕以二月十七日權駐溫州
者千艘攸濟勤營衛於海隅三捷奏功朝衣冠于帝所
南牧之師悉遁東巡之策最良臣某誠惶誠恐頓首頓
首伏以民之歸仁猶水之就下天之助順如響之應聲
我師鷺鳥之匿形敵騎長蛇之薦食雖強弱之勢異而

曲直之理明講論綏靖之圖已見收復之績臣新叨守
土久忝殊恩願奔行宮省視官具招輯戰士啟先戎行
內馳螻蟻之誠豈勝雲日之望伏惟皇帝陛下寅畏天
戒懷柔物情引咎責躬訓詞惻怛絕甘撫士宵旰焦勞
豈圖一切之近功方興萬世之長利忍忿避狄鬪智從
戎懷梟鴟以好音不惜皮幣消祲沴為和氣益省征輸
庶幾多算之有成以致羣兇之嚮化二聖邁返四境解
嚴憬彼鬼方亦三年而能克修吾國政無一日之苟安

經緯乾坤盡納富壽臣無任

賀天申節表

至貴之符於昭出震中興之兆丕佑乘乾恩霑動植飛
潛可謂至德厯象星辰日月期於無疆於萬斯年積億
善頌中賀伏惟皇帝陛下天所睠顧民無能名生而神
靈會于皇極方且諮訪黃髮賜靈壽而乞言感致白環
摘蟠桃而屢獻軼華勛之壽考過成康之措刑臣拘系
守符阻慶班列嚴恭寅畏信乎享國之長清靜存誠茲

乃攝生之固何止上千秋之鑑益誕敷五福之疇臣無任

代人謝放罷表

恭承朝命祇解郡章敷宥從輕省躬兢惕

中謝

伏念臣

草芥微賤天地生成願盡忠誠無忝器使郡當孔道實為逋盜之奔趨釁起鄰邦責在守臣之捍禦不能固護於封壤何以撫循於吏民敢避嚴科幸蒙罷免此蓋伏遇皇帝陛下茂日新之盛德恢天覆之兼容厚生惟和

慎微接下照臨幽枉兼納賢愚藏疾并容矜愚不逮臣
仰荷仁政俯念悔尤靖言初終亦非偶爾嚮者兇黨方
熾州兵至微驅烏合而待其衝收瓦解以抑其勢屢獻
俘馘遂失枝梧徙老弱于它山濟府庫于別浦敵無所
得民亦保全論其衆寡之間難遏奔衝之勢彈章薦擊
吏議不輕席藁何言負芒不暇誓當洗滌於塵垢庶幾
脫露於錐囊稍贖膏愆更圖績効臣無任

賀天申節表

聰明睿智膺歷數以在躬錫美休嘉標震誕之彌月祥
開是日慶浹緜區草木欣榮華夷交慶中賀恭惟皇帝
陛下德惟善政道本生知綏靖黎黔濟風俗於富壽寅
畏天命知稼穡之艱難蓋舉二典以同符宣但四人之
迪哲臣備員從橐阻望階冀歌天保以酬恩無疆惟福
同嵩呼而請祝於萬斯年均祐函生永建皇極臣無任
代謝賜茶藥表

奉命登車顧遵周道使華按節傳諭堯言不遠威顏踈

慄矜眷

中謝

伏念臣瑣才無取賦命數奇矧經憂疊之

餘驟領蕃宣之寄體上醫之活國念靈草之濟民安危
所關錙銖責効惟時故事亦玷常科罔間孤蹤有茲好
賜珍奩品齎焜耀室家異數殊恩歆艷朝野此蓋伏遇
皇帝陛下使臣以禮御世須才有攘消疵癘之方以聚
蓄收採為富臣敢不推原斯意勉盡其心撫調發之瘡
痍雪鰥孤之困憊芟夷寇亂如決贅疣崇獎忠嘉若護
元氣思之熟矣幸而得之臣無任

代謝馬表

恩俞入覲敢俟駕而後趨寵數殊常冒脫驂之蕃錫輟
從內廐竦動私廷鳳臆蘭筋鏤錫金卮榮逾三賜禮異
羣僚揣稱自量非據尤愧

中謝

伏念臣誤塵人乏遙企

周行許國驅馳逢辰亨奮眷任增重志願彌堅將收其
汗馬之勞幸假以絕塵之乘拂拭羈策憤激胷膺伏遇
皇帝陛下天施無私綜覈名實聖謨廣納優待俊良朽
索常懷長轡遠御神算非駕拙所逮微績當策勵而成

臣敢不强勉罔功夙夜匪懈老而知道恐不繆於冥行
範以從禽誓不為於詭遇臣無任

代謝金帶表

一介孤愚詎貪篚實之腆重錙焜耀優寵身章之華恩
出非常眷隆加等

中謝

伏念臣蚤從韋布中預措紳

齷何功安閒累歲暫墊角巾于草野豈圖端笏於鴛行
垂厲有餘朽質無措公西東立于賓客之右綽有嘉言
安平橫驚于溜渑之間懋建奇績自惟小已景慕前修

安得勞能稱茲藩飾伏遇皇帝陛下知人能哲陳錫載
周固結士心不恪名器示斷金之義皆歸範鎔誦錫朋
之章可謂樂育漢庭盛賚敢云稽古之功孔里自言誓
竭為邦之力臣無任

代起復殿藩謝表

小志懷私懇畢祥琴之制大恩薦被稽違詔綽之行終
俾蕃宣弗忘器使支離強起俯俸冒膺無任覲顏莫迴
渙汗中謝伏念臣忠惟許國義切愛君不量丘壑之姿

自奮功名之會及物祈於無負憂人未能有為冕旒念
於前勲弓冶期於先訓晝訪每蒙於嚮納秋毫盡出於
生成不因先容叨承遴選歷職清貫超領宥樞道固無
窮才實有限一簣為山之始三人證虎而成負乘致譏
內頌沒齒銷骨興謗無辯自明始終睿慈委曲矜照茲
者至公獨斷洪造惟新祕近華資班聯耆俊要衝鉅屏
經制邊維楊拔矣而尋培車憤焉而復起伏遇皇帝陛
下天臨日鑒地載海涵軫其簪履之遺東其幃幄之舊

文拭塵滓收錄桑榆臣方且攬轡之官戴星圖治撫循
疲瘵調理戰耕念進思竭盡之心未輸梗槩副宵旰憂
勤之績不憚捐糜或允文陛之趨不為便道之計誓驅
馳之頂踵用推廣於詔條輓軌時宜韋絃家法臣無任

代辭免叅政表

倚注之隆叅貳宰事幾微所賴考慎民瞻顧非其才豈
勝厥任再殫危款仰冀矜從

中謝

伏念臣卑棲何意於

高翔短伎夙殫於已試委遠庶務幽憂累年整理衣冠

寢成疎野賜承清問獲近天光擢任褒揚湔洗傳致三
接優寵九殞未酬雖宸衷東訓之特殊而柄任知難而
當止緣智力不可頓進而識局惟堪小知覬偶合於毫
分恥循默而尸素方今內外修攘之際聖哲馳驚之秋
副寤寐之焦勞必建明之幾警惟密勿仕道之佐能毗
益欲治之君譬如周王命樊尹以軍國內藉張仲之孝
友故無妨功害能之姦唐皇任房杜以佐佑而又咨鄭
公以獻納故有盡忠竭誠之益厠其盛選豈容常倫上

累休明殆由鄙陋姑祈冗散豈過分而叨踰聊欲自安
固當引避於隆顯伏惟皇帝陛下執利世磨鈍之器念
因任責成之功使鳶魚自適於飛潛而棖楹各隨其鉅
細宜寢渙命允協師言免貽覆餗之愆不溢挈壺之量
遂其懇請乃劇知憐惟器所堪竭誠圖報臣無任

代謝許終制表

渙命奪情頗緣金革之務篤親違詔固終苴經之期悚
懼難任繼蒙俞允不愆素守實自眷憐

中謝

竊以公爾

忘私喪不貳事慢令聽刑於司敗慈顏欲報之終天隕
越不遑進退惟谷臣世執矩範家紹弓裘德涼祚衰創
鉅疊積餘生視息粗知禮經俎豆典墳平昔聞見既乏
服戎角力之勇又匪振兵扞敵之能屏迹衡茅方劬勞
罔極之慕忽分符竹亦黽勉何辭而行區區曾閔之懷
蕩蕩唐虞之化恭惟孝治無取從權以蓼莪之思忝行
葦之施此蓋伏遇皇帝陛下深仁篤義知遠察微成就
孤愚保全出處謂臣懇服名教必移此於忠嘉愍臣濫

在搢紳忍遽虧其志操善厚風俗冠絕古今臣土木形骸抱致君之深意蓬蒿心目誓許國於茲晨庶幾微塵稍增喬嶽臣無任

代慰國哀表

臣某言伏覩今月二十五日聖旨太上道君皇帝厭世升遐寧德皇后上仙者訃自龍荒哀恫中國奉諱之始號慕攸同中慰恭惟太上道君皇帝二紀憂勞萬方亭育遜位貶號謙抑逾涯未返常嶽之巡遽陟鼎湖之駕

寧德皇后表正坤位贊祐宸居從翠華而遠游渡沙漠而不返羣黎百姓攀咽無窮皇帝陛下孝切羹牆痛深此岵伏惟降抑哀慟俯全禮經臣無任瞻望殞越之至

祝聖壽表

興王景貺福生有基享國昌期道乃能久里社鳴而紀節嵩嶽呼而發祥浹縣宇之歡心同一詞而善頌中賀恭惟皇帝陛下施由庚乎庶物以無逸為元龜三靈協祐以儲休九有來同於富壽方將舞干羽而渾文軌頌

正朔而服要荒寔明寔昌襲無疆之厯時萬時億降有
永之年臣阻扈和鑾依戀行闕華封獻頌爝火太陽小
草何知傾心委照臣無任

徽宗祔廟慰表

賓仙蹕於雲天廓然遐陟從祖禰於廟室永言孝思凡
屬臣民共增摧咽

中慰

竊以飾終之容典惟備追遠之

想望何勝敘宗祧昭穆之彝倫為禴祠烝嘗而作主所
以達睿誠欲報之德係邦國哀恫之心伏惟皇帝陛下

愛欽盡于篤親，苾苾昭于孝祀。致終天罔極之慕，妥皇靈如在之神。存手澤以感音容，每齋戒而思居處。風木不靜，霜庭惻然。願抑至情，以幸天下。臣無任。

代駕幸臨安起居表二首

六龍順豫，旋軫勞歸。五玉駿奔，奉贄敢後。廓吾天步，匪惟建業之江山。俟我后來，延望武林之黎庶。上宮闈之管鑰，返羽衛于室廬。遐邇謳吟，人靈胥悅。中賀恭惟皇帝陛下，仁提三尺道，運六韜御世。冰淵弗遑，寧處救民。

沸鼎猶抑孝誠旰晷焦勞嚴恭寅畏鬱鬱何心於居此孜孜向善以強為念邦家禍亂之秋恢祖宗丕顯之業勤而不息樂以忘疲殆獲華夷之歸必期河雒之復臣屬嬰郡治阻覲旄頭之塵平定浚郊即建干旗之旆臣無任

又

戎輅西轅六師節制鸞旂返旆萬寓駿奔副吾王游豫之謠諧我後來蘇之願豈但却敵凡以裕人

中賀恭惟

皇帝陛下稽虞周之有為恢祖宗之丕業班師旅而苗
格脩德教而崇降從善易於轉圜應物明如觀火決戎
機於千里拊幅員於一堂使耄穉以懷安顧江山之表
裏鳴蹕浙右州縣無供億之勞尺書浚都邊庭必馴擾
而服臣周南跼迹咫尺堯雲闕下馳神祇聆禹會臣無
任

代謝青瑣表

西掖代言已塵寵授東省夕拜薦陟榮塗辭爵靡遑審

躬無措愧甚鵜梁之刺未知簪橐之榮

中謝

竊以掌百

事之稽違司萬機之出納審覆論駁之地興衰得失之
原使還詔批敕動獲所宜則發號出令固有弗當臣每
侍法坐親奉德音慎選疇咨殆求顯效叨據要任深恐
妨賢伏念臣志力尪孱資地淺薄偶時乘之初載同品
彙以偕升閱十祀于郎潛玷階華顯蒙三遷於法從誓
補憂勤方中興覈實之辰斯羣士願才之日而臣藝文
骫骳豈射父之作訓詞經訓疎蕪慙倚相之讀墳典板

摩鄙樸奮勵論思永惟復古之隆精審適時之略非敢
後也而才有限豈曰能之而願學焉欽副使令俯虞顛
覆屢上退閒之請深慙覆燾之私此蓋伏遇皇帝陛下
齊禹湯之勃興體堯舜之極致德智長而治道得俊乂
多而邦國寧誠能輯羣策之良圖必將致九有之咸乂
興進儒學不遺一介之凡激勵猷為益俾百工之起臣
雖愚懵粗識廉隅敢不靖共于朝虔恪底績乃心贊國
竭節忘身餘生何力之纖微畢命儻酬於萬一臣無任

謝江東運判表

代次公

祇奉絲綸載馳驛馭巡行封略覽視吏民

中謝

伏以江

左興王之上游淮壩聚兵之嚴警逮間暇日乃勵精秋
筦摧市關弛張貿化舟楫教庾糾擿蠹欺惟籌度罔失
纖微而意見務知遠大乃振軍以固本兼實邊而制戎
周爰諮謀華披原隰宣期器使誤及孤平激昂哀蹤負
載山嶽安有異術裨益涓塵竊希一得於百為或求千
里于十駕虛荷委寄實深震驚此蓋伏遇皇帝陛下勃

然中興奮乎有作施博天地仁察鳶魚臨下易而有親
燭遠幽而必照付外臺之耳目通行宮之要樞以臣肅
奉憲章粗穆朝聽施勞州縣惻怛黎元責効方來普勸
士者臣敢不每懷靡及食藥飲冰當官而行疚心焦慮
六條漢詔務叶公言五術唐臣專靳厚俗殫驚蹇之微
願副驅策之殊恩苟緩曠濫寧辭頂踵臣無任

代謝禮部尚書表

王政所關天臺治本邦禮專掌春官望穹貳卿方愧于

官箴六長所資於民譽冒塵予進闊略曠瘵啟處莫遑

辭避罔獲

中謝

竊以至孝睿明之主議禮為宜興復迎

奉之期顯親篤志由仁義而起盡欽愛而行近正長樂

之隆名祇嚴徽冊發自清衷之誠惓欽庀攸司鐘鼓玉

帛之設施承稟諮諏之程度繇力何有綸言所嘉謂蚤

能戴於丘山顧燭或裨於日月忝竊論思之地薦加寵

擢之恩此蓋伏遇皇帝陛下旰昃勞謙釋四海之鬱結

勵精覈實致百度之咸熙天縱聖神生知儒學方且投

戈而息馬不忘論道以橫經被訪對於延英屢奏篇於
黼座遭逢何啻於千載鴻私殆歷於九遷矧草木之朽
蕪當天地之渥澤非德智學藝不足以膺東注非公正
節行不足以玷疇咨睠錄前修褒表先緒施及不肖誤
被超陞位高深懼於疾顛才小胡能於為役念喉舌之
任期吐茹之得中居臺閣之間循規矩而斯在敢不靖
共無懈勉殫夙夜之勞知無不為以荅生成之造激昂
哀陋曷憚捐糜臣無任

賀東朝歸表

格天德至本自宸扆而刑多方篤親誠純不忘跬步而
還萬里奉寶輿之言返舉連環而不渝溢縣宇之歡心
魏高世之馴行慈襟一喜品彙咸蘇

中賀

伏惟皇帝陛

下本曾閔方寸之衷體華勛要廣之道勵勤精力吁祈
請于艱難菲薄盱宵慕溫清于遐邈方且顯鴻名而正
統紀曷嘗忘侍膳而捨寢門未宣暢於鬱堙久湛深于
宥密致極兢兢而業業允諧洩洩與融融蓋人事之無

虧俾天心之保定順承顏志萬國悅而養東朝溥博施
恩三表修而懷北顧較勞考事冠古超今如漢薄之代
來厥功絕易若鄭姜之穎出其事罔倫翕如覩大練之
光來歸著彤管之煒臣等幸叨盛際祇若徽音坤載延
鴻殆年長於西母皇枝繁衍益天受於太任臣無任

賀元會表

伏以垂象施教大一統於王正凝冕當陽舉盛儀於元
朔稽詳周典採摭漢儒夷夏來同天人昭格

中賀伏惟

皇帝陛下體元正大建極中興曩者每多外禦之虞是以未遑正宁之位裁成補敝肇自睿圖和洽光輝允謂儒效嚮明而治謹始授時設九賓之臚傳受四海之圖籍萬彙待發生之慶十行布寬大之言物備禮隆發聲明於度數化孚澤浹正班爵而紀綱臣夙濫寘行坐縻外補想簪紳之表著望雲日以神馳承明宣政之庭固嘗俯伏衢室合宮之事殆無復過嘉與蒼黔同茲鼓舞臣無任

代賀親耕籍田表

省耕千畝之甸親御三推之儀斷揉斯勤齊稂與祭惻
怛宸旨溥率域中榮觀日新聖風雲靡

中賀

竊以衣食

王業之要思文后稷之稱皇極建而五福敷烝人粒而
萬邦乂曩昔艱難之際擾徙安業之農故敦本為懷宇
先蓋未祈而造物相會通典禮底豫神祇伏惟皇帝陛
下存信去兵納民軌物躬行舜禹之急務力致宗廟之
潔豐興起彌文篤纂前烈誕降嘉種至治馨香如坻如

京以孝以享近弼碩彥調燮富民之封列郡循良申嚴
力穡之課戶戶樂生而勸善人人舉趾而授時天瑞地
符家給國阜臣究宣德意眇漢儀之六條遵稟化原邁
唐賢之八計萬耦于耜九土載芟偕生遜畔之心咸革
惰游之末臣無任

慈寧慶八十賀表

母儀慈懿帝孝遵承慕孳孳之色難躬顯顯之愛立協
氣流乎闡壺要道光于華夷稽前古之姜任繼今朝之

高向王化輔毗之燮理椒屋蘭闥坤元博載以無疆龍
輿寶璽於皇萬斯之紀肇登八十之齡三靈之溥命咸
宜九有之歡心一致甲子環匝幅員雍熙中賀恭惟皇
帝陛下體古訓於韋編運嘉猷于掌握德之所覃者大
文之所加者深宏休難罄於揄揚盡美兼全于仁孝臣
螢蟻至眇願增綴南陔雅章紳笏合并慶無量西竺遐
壽堯時舜旦獸舞樵謳臣無任

擬本州守謝御製損齋刻表

義經奧蹟致用研幾聖學高明發揮睿藻訓流金石化
首簪紳叨被恩頒虔遵模範

中謝

竊以味典常於大易

喻道真於玄門云乎損德之脩亦曰儉我之寶事人天

蓋莫若嗇去奢泰復返其根陋哉往古之夸毗灼然持

守之規戒

中謝

恭惟皇帝陛下效天法地盡性存誠崇

簡易而守成端穆清而凝命金甌全而邦基固玉衡正

而泰階平既道協於皇王垂衣致理則民敦於樸素指

掌何勞臣繆推歸美之源以補輯帷之闕倣謦欬詠每

字字以求思韞櫝珍藏但拳拳而弗置臣無任

雙溪集卷七

欽定四庫全書

雙溪集卷八

宋 蘇籀 撰

書

上門下侍郎書

籀夙志于學圭簞之下蓋嘗妄意計議今古天下之事
恥為空言必致實效以前輩為之宗盟如山如嶽然當
世富貴功名之士所欲見者無幾竊伏閣下之義不敢
近捨而遠希因具道其區區焉語曰時然後言人不厭

其言古者有大事闔國人而問謀及庶人今日誠是庶人得言之秋也故人有輕於一葉而言有重於太山蓋天下不治治之在本福基旤胎非偶然者亡羊而補牢勝於坐視也見菟而顧犬猶為得策也歷數前後亂吾邦家者大槩皆馭舌之相也譬如蛇蠆蝗蝻遺類餘種必為巨害仲尼作春秋吳越未嘗稱人荆舒咸在斥罰今奈何不循覆車之戒用閭蚤為相乎前此維揚旤變一薛居州齊言不勝楚人之咻一屈原獨醒未解衆人

之醉忠言至計蔽於悍夫之當軸剛狠怙權之所致閣
下政坐憂人之憂耳事之不如尊意者十常八九可想
見也甚矣世俗之難悟也伏念藝祖太宗聰明神武知
人安民法制規模防慮宏遠士大夫孰不由之不幸馭
舌之徒崇飾穿鑿唱其姦言鄙堯陋禹變蔑舊章掃地
無餘四五十年來人人風靡其說淪于骨髓綱紀頽圯
中原大亂中才之流甘心入於商鞅李斯之術天下滔
滔不知何者為正論所幸慶厯嘉祐之遺世臣故家尚

有佩伏羲方之訓不流俗尚者稱堯言而晞顏徒其間
固必有豪傑之士矣今日後生慕善者期待閣下亦云
甚重謂可以脩祖宗之法制推前哲之範模羣情顯顯
以為當然古人謂舉伊尹臯陶而不仁者遠謂仁者以
類進故也如使伊臯不引其類連茹而進則不仁者何
憚而遠乎今天下之猾賊幸天下之有變而欲有所為
天下之賢士倚朝廷之尊而欲輸寫其肺腑夫猾賊誅
之自有其亶賢士收之以旌其來此公議也兵戈之際

圖書部醬儒冠遭辱古之定禍亂豈特武人爪牙之功
乎文士實為之腹心也士有待價而沽玉抱璞而長號
者且夫一髮之不理一指之不伸尚且無聊視國家塗
炭則瞠然不能效尺寸理必不然也忽而弃之則過矣
方今鄰敵內侮如未解倒懸之勢兵衛寡弱有外強中
乾之敝府庫殫竭有旦暮不給之慮盜賊江右伺候羈
縻綏御之策此四患也大者金人之害尤為難圖譬之
洪水堤坊既立水行無事而後可也堤坊不固無所措

手足矣吾以天險為堤坊不亦可乎塘濬不足道也其次兵衛寡弱當遣信臣招輯散亡來者厚加存恤則行且漸盛矣其次府庫殫竭當效衛文公秉心塞淵則萬艘繼來國益富矣其次盜賊江右御得其道寇讎化為親戚置而不問將為大患在所慮也古來夷狄之患未嘗及江以南累年秦齊晉魏被其殘虐中原討掠殆盡惟大江則不敢睥睨其力不能也彼貪財好色非有長久之計肘腋之變當在旦夕朝廷據有荆吳越蜀之饒

尚足以蓄力養銳以俟其敝然恃江立國雖有天險之
邊防荆襄江漢上流未見其能固守也守禦之備莫急
於此使江漢之間公卿刺史下逮卑隸芻蕘人人具其
術略決擇而參用之其利害必盡得也然後擇高才絕
識者統其事朝廷用人何事不濟且如拜尹逢於倉猝
收劇孟於擾攘不以為難至於爵祿曾無少吝足以使
才能者奮也似是而非者尚能聾瞽耳目猶在察焉夫
觀人以所言不如以其所學考其所學則處心積慮咸

可見也然後試之以事則無所逃矣以人事君大臣之
先務也閣下亞聖之裔孫深得鳧繹先生之文采風流
箕裘典墳組織道義其仁如晉趙武其博如鄭國僑翊
戴社稷有良平之彌縫成就人物有房杜之明果偉然
柱石誠可謂山東出相矣絳帳東閣之士共由此道不
乏其人吾道未至大光小人尚敢肆行則十哲三千之
徒未滿也宇宙之間高才日少古風不競可謂太息汲
汲孜孜其可已乎籀嘗學於先大父樂城公聞其許予

所著右史願從尊先舍人咨考有陋巷接尺椽之意其
相知可謂深矣不肖頃者游梁拜伏館宇辱枉題門之
寵今日非敢若衆人畏貴慕勢而唐突也譬諸草木在
公之臭味矣顧惟潦倒踈冗有琴張曾皙之狂無叔牙
管仲之友間關失職遂哭窮途灰心木形槁項黃馘豈
可分毫貶屈泚紕灑削緯蕭織蒲豈不足以自食糴之
所學恐不止於此所求亦恐非為餽啜而已不揆其猖
狂之辭略及今日之故若蒙收採顧遇使無補於邦家

斥之未晚也俯伏賓次罔知所裁閣下幸察焉不宣

上戶部尚書書

籀聞建邦猶之作室其成也非一木之所支及其毀也非一繩之可係昔者海內平泰規摹遠而基扃固羣材各勝其任實實枚枚貫百世而無敝飄風暴雨不足慮也雖有匠石亦當袖手不幸蠹蝕蟻漏棟梁不具而榱桷欹側或不察焉則摧墮圯裂至於不可枝梧於是命工考室以還舊觀此雖劬疚辛苦而亦功名之秋也嗚

呼非良工師何足以預於此天下之材樂育附輯而來
出其端良雄傑而繩其撓腐拳曲規矩斧削可以無憾
斲喪衰頹之後妙手尤不易逢珍材亦不易致也使拙
工率意為之必將截榆以擎承露之槃折柳以樊狂夫
之圃豈不殆哉今茲天下塗炭夷狄交侵以安社稷生
靈為心持衡鑒秉公正此乃考室之師也閣下負超然
絕異之姿挾出于形器之學咥赫蚤聞年如公瑾破烏
林之歲碩大尊顯功業先乎祖生而著鞭于時天下寧

謚伏獵狀杜之徒忌嫉高賢故淹翔符魚節鉞之任而
卷懷埏陶烹幹之才滯留畿輔漁釣江湖者凡十餘祀
顧當途皆血指汗顏者亦預知其誤國也一旦有警事
焚如絲呼吸生變戰守之計未決鄰敵之情難料四海
六合之大化強狡而安反側喻日新之德意求其識略
宏達尺紙片言可以排難解紛萬舉萬全而無遺籌失
策者在庭其誰乎中外始有才難之歎矣詩曰絺兮綌
兮淒其以風言庸人不可用也天下咸共推曰閣下今

之陸贄也公卿之間最為先進委任之久最為更練執
文之苑最為美博裁處之際最為智辯天子虛心前席
見晚眷獎之渥旦夕大用考室之師閣下是已積穗以
基之裕民而庇之方且鞏固輪奐安若太山可以為天
下賀也所用尋尺之材必經顧盼焉班斤待郢質而良
工須利器天下其誰不願才乎噫致君行道蹈堯舜周
孔之堂室門庭文字溢於竹帛勲業昭于旂常絳帳受
經之生皆鶚立朝右堂下捉刀之士有長萬夫者矣天

下之髦俊經於閣下耳目既厭飫矣文章道術據其復
命之根而縱其熱天之焰即之望之者駭愕眩晃自失
而走者有之矣今夫瑣瑣之流欲徹聲聞於帳下者亦
僭越矣恭惟孔氏之道曾子子思之傳而孟軻治氣養
心以擴之莊周屈原各以其所見而鳴漢揚馬振其光
而唐燕許颺其芬退之立言復古掃諸子之陳迹宋興
楊劉肇基歐陽公始唱天下削時文之敝其文奄有孔
孟之餘烈兼衆作之芳薌近世學者多不能誦習歐陽

子而流入于異端往往皆喪邦之說天下所以流血蒼
生所以困斃者鮮不由異端之所致也閤下之學今日
歐陽子之徒也正人待之而為善匪人待之而自新籀
竊伏下風從諸父昆弟嘗游門下究觀盛美之緒餘糟
粕不為不久區區見聞亦晞驥之乘也近者避地江左
貧無置錫之地平生之志窮而益堅老而益壯其磨研
編削粗勤其取舍是非甚明不揆其身之疎冗輒進伏
于閤下之賓次自謂推孔孟之派講韓歐之風者世人

之治此道者益衰少故與我者亦希焉大君子日進此
道為之不厭嘗試請益焉庶幾不拒也吾道斯文乃所
歸嚮矣昔羊舌肸棄樂王鮒而望祁奚之舉太史慈以
北海知己而為之解圍關忠義得孔明超逸之褒而增
重於世牛僧孺被退之題門之寵而名動京師古人之
心契氣合如魚之游如鳥之翔甚可樂也顧惟潦倒之
才口耳之隘譬之游俠滑稽方士日者大君子未劇棄
也若夫選掄而加藻飾焉共登成廈之功免于泥塗之

辱使滌慮潛心以發揚盛德大業當仁徇義亦可以奮
勵出奇也惟閣下所以進退之不宣

上時相書

籀不佞謬忝讀書聞道家傳古今治亂之學理世及物
之術先儒之未悟前聖之用意盡發其樞凜然略備櫝
載而繕藏之以為士而無益於人謂之苟生見三代以
來成敗得失猶為之悲戚為之欣懌身經天下之擾攘
邦家之屯厄當食不飽坐以待旦至於慟哭流涕也蓬

廬單戶貧守一席之間無所役其心狂狷不揆思推所知以為世用凌厲憤悱知難而不知退臯陶后稷在千世之上每願為之執鞭共工寒浞見傳記之間至於作而按劔恭惟主上時乘六龍撥亂反正天下安危注意閣下閣下籌畫精穩左右彌縫斷大疑決大計視遠聽微疚心竭力所以消惡運遏亂源因旤為福轉敗為功者何止六間三奇乎邇者兵民就其條理盜賊去其七八邊防增固鄰敵益馴舉直措枉裁成中興之業天下

咸知帝力之所自弼亮之得人焉稽以憂時之深故樂
賢之切聞風覽德寬然自壯毅然自立擊唾壺撫絕編
仰天浩歎稍溫其所學譬如日侍仲尼老聃之言而旁
揖賈誼陸贄也思之而能信固宜仕矣今天下瘡痍未
復詬恥未雪抱冰嘗膽不容少解義冠結綬連茹而來
非徒然者百慮豈獨一得尺短豈特寸長乎或曰陽光
盛于四海敲石者何施霖雨澤于九土抱甕者徒勞而
況飾鑽縣令之說造次直前猶擊瓦缶于洞庭之野何

足道哉籀應之曰岱嶽滄溟所以極高大者不拒涓塵也騏驥鴻鵠所以致千里者四足六翮也相公罄天下之思而用之無餘謀竭天下之材而使之無餘事長育天下之英才譬諸草木區以別矣椅桐梓漆長而諧律度薦郊丘杞柳松栢養而備雕斲作器宇薑桂因地而播其辛蘭芷在畹而颺其芬烏啄豕零盡其用蹲鴟蒺神不相瀆蘋蘩由斯而進羞葑菲由斯而可採夫草木異稟農圃不能易也例能使之竭其才耳如此處天下

之英才亦無不奮勵而榮耀矣蓋得其道也忠智翹傑之士康濟之所賴也仁義學術之人皇極之所建也鄙如投蓋馮河憎如吐茵食馬賤如雞鳴狗盜陋如蘧蒢戚施未嘗廢一焉此長國家之度也大丈夫立太平之基為邦家之光天命享人事盡威懷四夷日闢百里安於太山壽於喬松聲華藹當世餘慶及子孫得其人而任之無強於此也今者國之龜鑑道之淵藪吾君之所尊禮萬國之所宗嚮無逾於閣下者學術之根源事務

之輓軌官師之所準的姦偷之所革心無外於閣下者
嗟夫一夫巧射則百夫決拾一相忠嘉則百僚景附天
下之士聲氣相求道德相悅閣下雖遠權勢避私嫌以
斥退請謁天下之士方且隨閣下而不置也咸望乎品
題而並祈於引達何特此哉凡有不獲焉不勝其求也
其可却諸士君子實不易得也羅之如獲鳳麟蓄之如
寶珠玉屏之如倒持太阿失之如喪一敵國故視其士
之得失為其邦之興衰近者天下不寧士之無賴如季

布者北走幽都矣放逸有如管寧者東走遼東矣其懷
土而重遷者或殞身寇讎其遭難而失職者或餓死坑
谷其得趨伏于相公之戶庭者固匪平時之比也相公
其念之乎籀所謂家傳古今治亂之學理世及物之術
可否獻替有成效矣掃迹朝市採薇山阿有所未能生
生之具可謂窘矣居無屋而食無田士之失職亦以甚
矣愁憂傷人筆墨扞格魚喁虫吟嗥呼凍餒空自慙笑
耳相公命以位竭其才力伏役國事者不知幾何人矣

其獨遺一夫乎昔籀之先大父欒城公以布衣奉書魏國韓公大蒙許予故達於天下魏公守文之賢相也籀之荒蕪潦倒誠何足以晞先世之萬一當今創業之難過於魏公之時遠甚是閣下比魏公有餘然慎微接下又當急於平世也籀雖疎冗豈得默默而已耶姓名茫昧唐突帳下辭情迫拙不知所裁願賜優容慰其胷臆閣下其察焉

上李丞相書

恭聞大人之道其高者登天其深者潛泉告之於人主
施之於四方端偉烜赫不名一器其在衮司如斗如獄
指迷當世鎮服四夷可否予奪公議灼然其外可見也
其胷中之嗜好尚德愛義斷可知矣故無古今無榮賤
取茲兩者而已仰惟崇堂鉅屏簪履奔嚮投刺如櫛一
介之賤束帶以干門隸求徹聲聞于左右草野唐突誠
可笑也至於貪慕德義則豈必疎於衆賓哉夫絳灌鼎
貴或不工文霍衛顯重鮮能喜士則儒道何施歟今日

以斯道覺羣黎豈非在閣下耶其為人也挾至足體要
之學操梗切根本之論愛君納諫革容悅之風理亂振
兵破蓄縮之敝氣充區宇名滿四方橫翔捷出間兩社
而摠八柄又方當盛壯之年附之以韓魏而初不矜劫
之以賁育而未嘗惕眩之以儒墨之辯而不失其所是
投之以磨礱之野而不撓其所存伊傳周召狐管樂蕭
彼何人哉光于鼎常耀于竹帛拔天下之大艱拯天下
之大患以為已任隨機應變有餘裕矣閣下方且澹然

淵哉燕居無作其實負素望饗厚秩比牒同時者已耄
當軸處中者晚進故夫格天之事業物議所不置也夫
韋編蠹簡談經紬史此亦盛美奇事治一卷書於治天
下閒劇之不同也又如釋道二家苦空妙義之宗服食
修煉之伎此於養生則厚矣治一身於治天下緩急之
不同也雖然閣下高翔遠步以軒冕為繫維以世味為
浮雲視衮繡二府與黃冠白屋無異也朝廷之倚任有
識之責望在彼而不在此也竊以謂有所聞見不當緘

默大計深慮以安社稷為悅示體國情義之親不亦宗
工之任乎或曰道之難行也則如之何夫事固有小大
小者何足以云至於係安危成敗眾所未察我之獨見
言出而後計從亦何可緘默耶且夫當朝豈無似韋處
厚者則在外有如裴中立勢不容久淹也至於任賢使
能中興之本又閣下之任也今欲得常才之士以無曠
職欲得奇才之士以共理世夷易其所入之途使來者
虛徐而自得封植而淬礪之賞拔甄品豈獲已乎邇來

喪亂之極必將升乎閣下與凡門下之賢俊實任其事
必將卓然大副天子之意炳然審天工之付委言盡用
道盡行朝廷得策生靈晏粲百官稱職殪戎正華勲績
籌略非我輩之所能測知也只如本路羣賊閣下原其
旼端由殺子之報辭切理明刻于路隅允黨化之油然
忠孝之心生矣愍時憂世之所蘊可窺其一班也一介
踵閣者未可以語人才大鈞之播其肯自棄乎伏念昔
日乘平書獄頌法律者三年儉狃之故調軍實論攻戰

者又累任皆蹭蹬而無功過則鮮矣積藏舊書經傳略
備陋目得一忘十時求夢奠老人之旨行誦而坐思之
不忍棄大而嗜瑣四十之仕齒髮將老九品之秩炊春
無餘仰企光塵哀鈍之蹤庶未擯斥昔者郭駝鄙人而
理民者取之梓人卑冗而相天下者取之輒冒獻其猖
狂之說有合於大人之道者亦養木作室之類也至於
諛而慕勢則不為也所祈嚮者德義不可誣矣才下論
卑幸垂照焉如賜一字之惠以獎其進執經秉筆將繼

此而有請敢悉布之可否惟命不宣

上朱僕射書

竊聞道之難行自古所歎於時危而尤難焉惟大君子
則易然社稷以為悅華夷以為意拯患拔艱使禮樂征
伐自天子出雖百世而不失此所以為大君子也以小
丈夫之氣臨之慮未及周處之弗審眩名而遺實舉一
而忘三左振而右靡前顧而後傾失足而入河海呼吸
而陷寇讎雖有經世之心尊王之念其身已不自保而

何以保其國愛其君哉徒為天下後世之嗤咤耳學道者莫不欲施之於世惟其彌縫提挈無遺籌失策故曰難也昔仲山甫以不畏不侮而相宣王致周室之中興季文子扶持魯邦誅戮巨猾其君用寧陳孺子居擾攘傾側之中漢室俾又三人者皆可謂大君子矣竊嘗伏觀建炎復辟之詔而竊珍慕閣下真千載人也彼仲山甫季文子陳孺子而當茲時其機略亦不過如此耳方二凶人之肆逆也婦人小兒頓足切齒欲死之而不獲

雖有責育之勇蒼猝之際無益於算閣下端委神氣不
變廟堂之淺深使彼莫得而窺大直若屈偉度絕人陰
離其黨徐破其計天地順敘忠義炳著稱為社稷元功
之臣繫閣下得之學道稽古以御今之術也首出羣公
之表祇膺太平之責內寧矣外患尚多也求為首末無
間言初終皆盛美嗟夫是不徒然者也衣冠所以推予
者以閣下器識才諳久有以服於人故也今僭偽孔熾
強敵憑陵急切之務大者兵食攻守爪步防佛狸之警

淝水慮付秦之虞開口待舖者不下十五萬人可以控扼者無慮數十餘處陸抗之疏王濬之計可謂龜鑑士馬儲械簡閱必當兼用柔輯表餌之略其費不貲斟酌時宜料敵論將調帥乘之和大小智愚適可以相制將帥有志國家之急者慨然以盡敵為意而患在不能料敵是以無功如閤下專務料敵善之善者也審察而預圖之故平居無廢事緩急有成算庶幾祖宗之宇內可復也此數者立而吾道大光首末初終之論可無憾矣

數者不立雖欲奠枕不可得也大政所關羣情翹首萬物咸賴天下有能有為之士駕馭鼓作入吾術中所譽必試用人之柄不可失也兼納庶言無擁下情以冀竒謀異畫之來議論之權不可曠也嚮賢尊德講藝修辭文章之宗不可避也閤下力行之無負天下之大而已使斯人奮發激昂勇於由義樂而赴功革其偷安苟且之俗皆風化之致為也用兵如方叔召虎機辯如魯仲連言語如行人子羽者未必不獲也多君子以助治理

矣恭惟主上勵精興復典學天縱方且整齊乾坤步驟
湯武委任之重豈有它哉閣下憤懣宵旰翊贊經綸遵
導謨猷每進仁義之隆君臣之際簡易健順超軼世俗
數千萬仞此天下之士所以樂為用也夫婦之愚有不
獲焉草萊之士有失職焉則亦司其憂任其咎道固如
是不以為勞也仲尼有云知我者其惟春秋乎籀之不
肖為天下安用自幼竊好春秋左氏之學以為周孔之
常道也蓋春秋天子之權也始隱獲麟二百四十二年

之間所以獎王室理華冗文武之王澤未遠諸侯大夫
尚可告以義理記其成敗忠邪引王法以繩之加賞罰
於千載之外天人之際靡不該貫焉施於後世王者不
可一日而無也夫然故知周公之德與周之所以王微
春秋則周室不為周室中國不為中國矣此書嚮遭詆
斥廢錮故學者尚寡今以此尊中國攘僭偽閣下殊有
力於此事矣區區佔畢小生見前古之聞人尚知慕之
嘗伏光範之門在坏陶之末矣困於窮空竟未有以獻

其愚不能揜其無似之迹點汙記室之清塵睨覲賈逵
杜預之鑒或者得一言以自壯惟其適道抄忽宜無纖
毫補於朝廷竊妄論大君子行道之美因得達其所聞
不覺喋喋不知者以為為利也其知者以為為道也閤
下滌除四海相王室禮樂征伐之出天下復平籀亦願
不負夙昔為道之志焉伏惟貸其狂率之誅幸甚幸甚
不宣

上趙樞密都督書

愚竊聞朝廷大臣係時理亂惟文武兼資則可以有為
今日國步艱難譬如解體髀者不可嬰以芒刃斧斤礪
而已矣枝傾壞者不暇顧夫藻梲棟梁壯而已矣蓋惟
文可以附衆惟武可以威敵入相則百度正出師則四
夷服古之人解兜鍪而冠貂蟬自廊廟而履行陣投壺
而講策畫緩帶而觀經傳乘勝決機氣勢盈溢丹青所
畫竹帛所紀皆文武之大才也時危而用不武之人有
禪僧放鷹之喻治遠者必自近始欲治夷狄先輯中國

外內皆重任也偉人在朝知無不為豈憚勤劇措紳欣
屬猛悍屈伏咸願其當軸處中然使其坐論王伯燕安
鳩毒桑梓之邦陷於塗炭豈得不慨于懷乎夫以隱情
惜已為持重厭事苟安為待時則何貴乎智勇何尚於
功名乎惟其英傑之度專意興復忘家殉國所以殊絕
於凡庸也往者綱維不振士風迴邪談虛無注篆刻以
為儒術厚包苴棄韜鈴而取將帥今其遺臭未遠餘孽
或存戎鉞之寄實難其人夷狄憑陵中原羶穢良以此

也冕弁端委之倫非其能超軼世俗改途易嚮則何以
步驟周宣中興之佐乎主上勵精閣下激昂吳越非勁
兵健馬之所出關隴有脅從思漢之人心多士盈庭皆
未易當此重任也以閣下精治道見兵勢以帝王之法
則裁治中司以桓文之節制撫循二鎮有惻怛綏靖之
實無僥倖行險之失凜乎經世御軍之略信有文武之
威風矣故綸絲布出陝蜀荆沔先聲萬里之外士卒鳬
藻黔首壤歌必相慶以為得人識者謂吳之強弱在蜀

之安危蜀之安危在隴之嚮背夫騎兵出于隴右而財賦從蜀來蜀為隴之根本隴為蜀之股肱秦為天下樞機故得隴而秦蜀大寧矣不得隴則秦蜀無能為矣秦隴皆得而梁宋在吾指掌之間并地可絕河而收也論攻戰者千條萬緒進退得失可豫言此者也朝廷據有江淮設險守要僭偽在齊梁而秦隴兩河皆為敵守西南之人不能出大散之關督府所治正當我之咽喉建瓴席卷世豈乏人也哉前日張公嘗為此舉矣恃卓然

之忠義不料敵勢之方熾不察吾帥乘之未和以新輯
剗傷之餘未暇少加練養而與百勝無前之寇決死原
野此志士所為太息也愚頃者嘗以書見張公論兵不
可必用公易而不察也閤下之此行比之張公時異勢
殊矣鄧禹歸而馮異擅赤眉之捷裴度行而李愬得李
祐之降閤下之功名高於張公十倍可也昔韓信佐高
祖乘章邯之結怨于民故還定三秦勢如破竹蜀人攻
魏以孔明之賢而不能得其志值司馬仲達之強也成

敗可以鑑矣料敵制勝者雖有婁曠之聰明終必憑於
間探之精敵暴骨以逞斲中國十餘年矣重兵散歸國
內再調發而無辭子女玉帛饜足充牣再來而吾無可
有彼所謂謀臣猛將為陝右膏肓者已天誅之故攻蜀
則不能入而退據襄則狼狽遁走是我師亦稍強於曩
時也彼之兵將既非前日之盛此似有可乘之隙敵似
可料矣然吾間探未精殆見其皮毛之事安知其無它
謀臣不能更遣重兵乎故秦隴之事在精其間探也古

之用兵惟間探為急務且如一舉而取偽齊定京雒唾
手可辦信如成功之後而與我為敵者尚在北境用兵
亦未弭也譬如搏蜚去虱何損於牛昔孫權嘗謂曹孟
德曰足下不死孤不得安今吾朝廷若非強寇之死滅
亦不可謂安矣兵法曰知彼知己百戰百勝不知彼不
知己百戰百敗見幾而作攻守予奪之畫則閣下主其
諾也愚聞之師曰進取不如自守知自守之至乃進取
而無後患故羊祜杜預之賢巧於平吳而拙於謀晉自

守之術蔑焉謝安桓溫銳意并吞所獲不如所喪所以
無害者知自守也願閣下威德加於雍雒畔將潰卒必
相率以歸服王化而自守萬全之計常使內重敵不能
窺國家永寧兵革不頓至尊安枕而無憂所以成方召
之業者亦偉然矣嗟夫中原要終必克復閣下掎之閣
下角之江南諸將併力踣之以蜀之饒蓄謀養威裕民
勸農下賢容衆先收陝右五路之師與六軍期會于韓
魏之郊將符尊專號令齊肅戮力一心以酬特達之知

千載之一時也今六纛數日啓行用人之際下走以潦
倒貧困百僚之下倣匍匐於邯鄲受擲掄於燕薊其迂
鈍可笑亦甚矣輒不自揜其缺短之見卜姓妍於帳下
伏惟揖怒蛙赦吐茵釣播之廣宜無遐遺吹噓之榮宜
拒枯朽非所敢冒也庶幾不錄錄而負門下云冒昧唐
突伏俟誅譴不宣

擬上趙相書

恭惟理世之要澄源拯敝纖悉舉措罔非大公至正而

已伏聞朝論吏員猥衆闕次極少率一官而五人共之
一人任職四人待次仕者無窮而常員有限填咽充塞
不可區處有至十年而後之任者本祈獎拔之多而賢
路迫隘至於如此近制中都官待次日並罷斥詳味美
意戒於汎濫務在精切此舉非不善也前歲脩廢官除
用諸丞所添不過三十人今者驟行朝兵府僚屬以次
皆黜之不下七八十人其間不容稍留矣嗟夫以人物
為懷以宗社為悅毅然確然自任休戚而後及此灼見

閣下之心焉傳曰治本在得人得人在審舉審舉在核實古之用人取之至寬用之至狹取之寬故賢者不隔用之狹故不肖者無所容夫披沙以求金其始未弃沙也舂糠以取米其始兼取糠也終藉陶汰簸揚之功耳自今公舉慎選官曹之清必矣士之黜者誰不曰然或者以謂捨之則藏今既捨矣則宜遠舉遐引奉祠宮從農圃而已矣其長者以為安義命堅持操讀書立言貴於行也修身正家以治國也自進之路尚廣長逝山林

則過矣閣下統理中外獎擢延引覆載之內跂行喙息
皆有賴于庇庥而士大夫不蒙垂蔭理有不當然者夫
一意於退自薄自弃者也自奮自勵者豈鉅其無取乎
彼七八十人中其志意才略尚有人也今夫天下之勢
方且倒懸神州陸沉未能雪復夷狄憑陵腥穢寰宇此
政用才求賢之急也夫負能挾策自以絕出常流則愍
世憂時亦誰能默坐而已耶亦不容逝去也嗟夫才之
難也吾君吾相豈終弃人也哉所黜八十人者豈將使

失其職乎夫古之逐客復為尊官成大功名者矣三黜
五去復被禮遇者矣至於鄙夷厭賤遏絕忽略則識者
不敢以此期閣下意者鑒裁稱量丹青造化已素定矣
唐崔祐甫除吏八百時無遺才裴垪薦士三十餘人朝
野翕然二子尚能然是豈足以槩論高明乎士之無能
無求無思無欲可以投閒散羣冗士者莫如籀也罷斥
數中不在有無多少之間恃閣下之在上猶復一鳴焉
亦嘗承風旨辱軫念自惟身賤迹疎而有再三之瀆惶

悚無措嗟夫自待固未忍薄待閣下亦敢不厚乎今天
下所謂魁壘豪傑功業隆重閣下當軸實無忝焉與天
下之士共建皇極固優為也自惟非劉禹錫之才譽而
求牛僧孺之知乏杜牧之謀猷而覬李德裕之用亦已
難矣儻尚寬其愚訓其拙未忘掇拾之意實以有道貧
賤為恥若夫流落無歸至於累年私事也非敢輒言經
術道義學於前哲公論也其或小用結髮讀書白首不
輟亦嘗側聞長者之風而竊窺夢奠老人之意矣庶幾

用其道并其人試之以伎效之以官飛一檄馳一傳裨
補塵露書生之事也敢不勉焉吉甫作頌穆如清風平
生所慕恭惟今春敵犯淮泗閣下實為首相捍患禦災
之際舉無遺策虜以敗北誠願紀述盛德大業被之金
石以追配古中興之佐焉狂斐干冒俯伏俟罪不宣

上秦丞相第一書

月日稽謹齋沐裁書獻于僕射相公閣下稽不佞潛伏
隴畝積年甚多繆窺達者之槩嘗竊念今天下之本四

海之勢惟聞道者足以論之體道者可以揆之故曰論道又曰道揆聖哲居於其位撥亂守成獨知先覺陶冶六合運動裁成不外乎是夫道也者致之在學承之在師其體高妙應用不窮其迹墳典索丘其理仁義禮樂始也因筌而求魚終也忘言而得意其至極也天地待之而位萬物待之而育聖人傳焉豈誣也哉或曰天下未平斯才智馳驚之秋而談道豈切務乎愚應之曰不然夫博問精思渙然神解包覆無窮酬酢不置猶佩繩

縷帶規矩焉順之則興逆之則壞才智所及乃有限量
雖千慮百圖而不合於道則無益也才智非道比矣舜
之戒禹曰惟精惟一允執厥中詩頌后稷曰粒我烝民
莫匪爾極此理深博祛名教之偏蔽與生民為指南解
紛而不惑更變而適宜畫功於無形消禍於未萌其於
安危得失審矣人主用其言至孝至仁至大至明唐虞
變契不是過也子思孟軻能言之而不得施於政教管
仲為教造之淺而所治小子房得之黃石而神之謂之

陰符曹參得於蓋公而悟焉載其清靜今也任社稷重
寄係生靈戚休抱奇術致帝王開物成務無所不綜天
子咨沃四夷欽想巍巍青冥之上位居第一閣下膺時
之運萬目胥眄萬頸胥延天下之責誰當任之以謂藝
祖太宗之郡縣未復也梓宮之未來也太母之求歸也
淵聖之久留也以道言之四患之未弭為邦何以立耶
建炎以來亟戰而求之逾十祀矣傳曰先王卜征五年
歲習其祥祥習則行不習則增修德而改卜改卜烏可

已也主上焦勞日昃夕惕恭謙屑屑寒暑勤勤如蹈虎尾涉春冰焉臣下當糜殞以承旨意前此強寇興師傾覆撓亂塗炭宇內其臣民往往助桀為虐者則亦何顏與我通好故所遣使命徒勞而歸今彼立新君一時用事之臣改易非前日矣彼我之相與既非敵怨故使命踵來言還地講和議者謂其情難測事未可知睿明日躋觀書乙夜自誠而明昭廓洞達斷然卓然以大信交異類朝廷應變度宜觀其會通以行其典禮用侯公善

誘之辯賈生表餌之說乃下議和之令可謂導吾君以誠明仁孝殆戎衷發此善意道揆吾事成此大策窒之則塞抑之則絕我之於彼怨未嘗平憤未嘗雪忍恥含垢極矣何異越勾踐漢高帝之事乎古今不遠矣蓋天意悔禍穹廬革心易戰爭為誓盟變甲冑為皮幣轉睽離拘質為會合改怨仇愾恨為恩惠我之所得如此復何求哉顧措置應接欲其曲當浸灌薰揉消其頑傲耳夫戰不得已之舉也和名教之所許也方且郊館勞犒

贈賄異禮費雖千金不愈於奔軍屠城之釁乎訓兵練將投石超距保淮據江過慎之防先勝之計我故自若遣使之擾較之交戰何啻相千萬耶彼彼大國也雜用夷漢之士豈無人乎若有人焉其和豈徒然其言必不安非可以氍毹腥穢待也夫豪英不必在中國彼之於道得之五經之表矣況亦有詩書等也萬一地界漸復信使又至梓宮太后淵聖相繼來還此亦講和之當然也昔文王斷虞芮之訟相帥而歸周者四十國瑕呂飴甥

說秦繆則晉惠改館歸絳嗟夫文王能之而吾君亦然
矣秦繆能之而戎醜似之矣夫道德之化其功豈可量
哉名教之施其理無所不服吾君躬蹈高世之行天地
可動山河可移金石可開鬼神可格强悍不詘之敵感
而馴伏理之必然非硯硯之士憤憤之子所能測也又
適當閤下謀王體斷國是經緯之學大有施設機神明
鑒天實相之得道者多助矣夫鄰敵未賓侵地不復則
仲尼相魯為無效鴻溝不割太公未返則子房謀漢為

無功敵之不守中原其理明甚衆所共悉也責我以歲
賜委我以故境殆其款悃也太母淵聖族屬之歸又非
若地土貢賦之饒其所貪冒者何為不然乎假使朝廷
疑拒使者徒返我不因此而加强敵不由此而加弱失
事之機觸彼之怒貽它日之大悔耳昔曹公不禮張松
而天下分齊威矜於葵丘而九國叛事有機會毫釐之
差其患大矣今已納其善意加待使人詳觀虜情權其
利揣其害不得不盡也且澶淵故事遣使會盟南北寧

一無犬吠之警者百餘年歲叨我金幣充仞饜飫虜豈
不思前日之利乎今我兵日精若不議和彼豈有絲毫
之得於我哉務戰勝窮武事自有見機之時亦非天下
之遠慮至計也彼此民心畏死一耳今無荷戈頓戟之
勞肝腦塗地之苦而坐竢境土之歸問安之使兼具奉
迎之儀此非常之慶會事若無阻雖甚盛德蔑以加矣
雖甚勲業無以過矣嗚呼閣下勉勉孜孜建立中興道
義益隆四方所瞻天下之士聲同氣合者豈特腹背之

毛芝朮之籠所蓄耶亦相與樂夫志一道契之莫逆也
故不量賤遠輒論中極之毫末以為門下贄伏惟輟燕
私而一覽焉荒唐鄙野非敢為佞也矜愚而有擇焉幸
甚幸甚不宣

見秦丞相第二書

月日籀謹齋沐裁書獻于僕射相公閣下籀今春狂僭
冒干宰旅誤效計以勉廟堂之治特辭意蕪拙至今惕
若伏幸朝廷未賜嚴譴近日又覩詔令事宜弗能自退

斐然妄發竊觀自古道術通明之士正傾安危解倒懸
出陷溺皆不世之功三代久遠矣漢平津侯上疏武帝
云周公旦治天下朞年而變三年而化五年而定愚心
曉然見治道之可以然又曰朞年而變臣尚竊緩之武
帝竒焉遂以入相卒號世宗而董仲舒所陳稽緩所以
不合唐太宗問魏鄭公致理寧可造次而望乎鄭公曰
聖哲施化人應如響期月而信不為難三年成功猶謂
其晚太宗納其說貞觀大治嗚呼方其始進也何所據

而出此言以許其君哉儒者學以輔萬物之自然文以達古今之妙旨執大器定大業趨大時集大勲所過者化若置郵傳命旦暮燕越固千載一遇億衆一人耳豈易曰晷年晷月天下於變且信耶其未效也若妄談焉觀公孫輔武帝表章六經罷黜百家儒術光明時尚侈靡而務兵刑事業淺陋平津之說不甚用也其言故不大驗太宗克己慎微寅畏恭儉卒致刑措鄭公之言少行而驗矣夫在宥天下言必稱二帝三代非可局於漢

唐孫魏而止也大抵治功神速惟體道者為然二公槩
先覺斯民矣方今天下難馴者莫若北國一旦迴面請
和稽首來享慕禮假義顧信修睦矣難復者莫若中原
土宇而三京八路版圖來獻肆頒大青一洗惟新聲教
風靡者數千里於是梓宮母后許我迎奉兄弟宗族許
我遄返凡吾君之所願者無不得所求者無不獲豈非
聖賢相逢通于大道柔遠能邇和陰陽而平天地召致
感格如此其神乎仲尼曰楚昭王通大道故失國而能

再興百里奚曰行道有福晉君不從而失邦歷數近世
屢閱它相其體履或未盡善其任責或未克堪術略搶
攘功業茫昧雖欲許國愛君而才謨有限矣豈有一德
一心謀允事遂赫赫炎炎磊磊落落震區一變品物再
生合化離復奔迸太平之象卓絕古今乎漢輔不逮其
言唐相克酬其志閣下揆政庇民再尹天下今僅一年
孫魏之言效見茲日凡譽人者惟其公則無憾閣下首
膺經綸之任俊功盛烈乃無與二意者吾君朝夕念茲

盟府之典揚庭之號當不逾時竊料每存降抑深自挹損故使寵命稽停雖然固已播傳遠邇光于四海矣而不受其名不居其勲此大賢之高致世俗固不識也昔齊威公使管仲平戎于周王以上卿之禮享之管仲力辭卒受下卿之禮君子韙之仲尼曰微管仲吾其被髮左衽矣如其仁孰謂其霸者之佐而已乎其學必本於王道也故不怵於功利之際閣下遜避勲爵得仁者之心術矣重器大名著竹帛而銘鼎鉞終恐不免耳愚不

肖如僕者亦能知其所謂焉蓋聖上天縱日躋誠則明
矣所往者順明則誠矣知來者逆此伏犧西伯之極至
也凡功業遠大稱其所得之高深云聖學非所敢議矣
故令羣臣副睿圖之難焉最後登庸閣下蓋道德有餘
而勲績自遂氣合而張治具謨契而運化機朝廷之上
泊然若山澹然若淵勢靜則不可動計遠則不可窺至
誠之實罩于鬼方慈愛之衷孚于動植本於清心省事
無取智名勇功疇昔天下不幸波搖雲擾時以謂流涕

痛哭贊翊軍國惟詐力之是務至於馬不解鞍籌不輟
手移檄忘晝夜介胄生蟣虱然吾君之意未嘗怡吾民
之瘼未嘗去視太平若梯天焉道德之治虛一而靜豈
弟平易以接民物天地交暢故能使南北二國以信義
相歡割百城奉皇族而於我曾不少靳彼非近道不能
為此大度之事我非有道無以受此殊特之恩開闢以
來華夷講和未有如本朝之比也昔堯憂洪水光明五
教疇咨四嶽求賢治之若以流俗觀焉豈不闊遠事情

歟謂當日夜先從事於江河矣使五教弗明求一日之
安不可得而何治水之有此堯之用心也今我國家正
心誠意蹈仁義之實五教已明夷狄滔天懷山忽然如
潦水歸大壑天子無愧舜禹之聖閣下可謂致君矣自
今中原日趨平泰求所以安輯存恤使渠帥豪傑無失
職刺史縣令勤撫字法祖宗所以得民者勉行之酌僭
偽所以失民者蠲除之悉皆吾土與民也夫何患焉然
大江以北略言之惟見其利詳慮之其害何可忽念萬

世不拔之基無疆之業何得不詳也王猛有云善作者
不必善成善始者不必善後是以哲王良相戰戰兢兢
雖享其樂每思其終失億萬豺狼愷旋并冀盟約未甚
久固邊徼帥乘始遵漢儀人情詭兀之秋恃羈縻之形
勢譬之解衣包火張羅防虎其可忘戒慎也哉噫治效
患不速所願患不成今速且成矣功大患不謙圖慮患
不戒今遜且慎矣前慮却顧使無遺籌此聖賢優為也
僕之膚受末學過計私憂何補於算其幼聞長者骨髓

之論拳拳不能置也歸耕其分矣再伏光範之門尚幸
一見豈容無所獻庶於時有涓塵益伏惟大鈞誨之載
之不宣

庚申年擬裁此書

月日籀謹齋沐裁書獻于某官上宰閣下籀聞裨謔野
謀也公孫僑應對鄰敵載而與俱吳武陵疎逖也裴度
折衝靖國深識其才子產中立巍巍勲勞裨吳二生愛
悅從之而言亦不朽士固尚志雖位下迹微攘袂攬說

王公之前係時機權何小小之得失也君子慷慨之心
切不取小人循默之態矣竊惟高明代天之工慎徵接
下野謀疎議所以至也國家隱憂避狄之餘議論盈廷
有偏狃憤眊之見昧久近彼已之勢不深惟羈縻之良
策則將安出前春金人引去軍屯河北止限一水豈不
能觸天威撓淮壩有善意也不必張大敵兵貶駁我旅
昔日閭閻驚竄蹂踐之酷有目有足者見且蹈焉亦不
在多言之也彼烏珠輩與吾諸將等矢刃相加比長絜

大嘗失地形粗能越江而歸途狼狽悔恨之故更求萬
全故久不攻我況大江舟楫非敵之所長也宋之為宋
卜年千萬恩浹民之骨髓敵狃常勝吾人面從豈真服
乎使割地和好之利在我而不在彼彼安肯先割汴雒
陝西乎蓋和好之利彼此共之也夫拒抗鄙夷勿與交
接終不能屏絕之也擐甲縶馬而來惟有鬪耳幸而一
勝再捷兵挈釁結憂未艾也恭惟兩宮問安不輟何名
而戰天下倒懸生靈重負豈不欲解懸息肩耶蓋玉敦

珠槃留犁金匕豈無用之物哉議者每曰累年割地議和此其詭謀狡算使輶不得其要領忠信無如其變詐邀索百端使我不能堪和事難成也故雖得敵國之附五十城之歸而我自視欲然良以此也嗟夫不為何成不行何至危而費財者戰也安而費財者和也然二者皆不易焉我養兵勞敝又加以賂敵誠何以給賂不多則敵所顧不重要須將帥強則彼有所忌盟誓堅則詐無所施量入為出幣之多少適宜而已和之計鈍滯戰

之事疾捷非不知也假使留止一使尚勝覆敗一軍彼
四荒之外封圻之中安生樂業易如反掌豈他術哉夫
據朝夕之池儲海陵之倉幹齏茗之利介邕管之駒國
家非得已也敵人資我以五路河隴壯士健馬指日可
收彼亦不較知我尚強也愛戴吾君似若不薄矣昔藝
祖之臨御也南北未嘗通好駕馭英傑使李漢超馬仁
瑒韓令坤賀惟忠何計筠以備契丹敵騎莫敢犯也太
宗繼統用曹彬潘美出征燕薊互有勝負國史載之詳

矣自祖宗時不能制敵之死命章聖皇帝澶淵之役聚天下精銳寇萊公為相豈不知兵乎竟用文德不窮武事自後名臣如范希文豈不知兵乎亦以皮幣講好為言天生驕子騎射絕藝禮義不可以速化干戈未可以遐征我國家以神武不殺混同文軌聖聖相承專用一道不貴征伐其來尚矣今朝廷以道為原以仁為根合符於祖宗稽疑於墳史卜之於天敵情可見謀之於鬼事理不悖昆虫草木咸知好生之德天壤日月咸明至

誠之意大策灼灼亦既著矣脩政事講武備足以取重
戎狄夫金鐵可以磨鍊龍虎尚堪豢繫萬一野心弗馴
歷稔逾時靳固和事所請不允豈容中輟乎人情未有
卑詞饋餉極耳目口腹之欲而不悅豫者也金玉錦繡
迷心酖毒珍玩奇巧無益治理投以予之亦何吝耶將
命之人未得其要領齎送之物未塞其無厭縱使不甚
婉順亦非怒氣直辭矣此宜用漢高隱忍之計陳平見
機之速斟酌審諦而行之夫何患焉敵人方且觀我知

權與否有策與無得失安危之秋也且魯酒誤趙而邯鄲被攻女子爭桑而吳師入郢張騫之強力寬信王烏之囂面穹廬劉琨長嘯以解圍段潁外甥致無害種種類推其意智士聞一知十妙通蕃情者備行人之任焉藝祖搜覽豪英之多彼一時也章聖之任寇萊公尚可繼述敵人功無以加富莫與倫龐中武夫猶喜馳驅儒生有識者豈不知和好之事有軌可循利博而歸於戎主且必無意外之敗者也愚故曰和之利彼此共之耳

衆人見朝廷越在江左以疾篤瘡大療難愈緩夫良醫
銷痰神砭除瘡必矣閣下實尸此責任不然何以貴經
國之高略濟時之至計也哉傳曰齊君之母猶晉君之
母也布大命而強質其母是令不以名教也豈有兩國
之君結為兄弟而尚留人天屬者乎平日膝膝擾擾之
慮行且為洩洩融融之樂矣如使和好之外復有上策
古今大賢亦必言之矣窮髮之酋與中國之傑復有妙
見過於此者亦可以諮訪研尋也斯事誠非小小得失

矣明公以英風異才獨當鑪鉞廊廟高深情學瑣議豈能損益假如芻言毫端可用必不弃也區區塵冒惶恐俟罪不宣

上湯丞相書

月日稽謹齋沐裁書獻于昭文僕射相公閣下竊惟方今天下之勢大小綱紀斟酌調維廟堂邃深道周術遠算數精審幹邦槐棘之彥命世佐時之機凡常庶官不足議之僕就義忠公之誠奕世補報之心弗以榮賤閒

劇易其介徒以憂慮私歎激其衷屑屑孜孜邀祈控訴
憤悱拳拳所願瞻依者天下大老伏惟閣下稽古致時
應半千之期攀雲附翼勵蓋世之略秉人文師表蘊智
辯裁成冠一時而綏庶邦謙而加之以求善無厭健以
至於宣勤不懈頃日小夫不自分限輕千里而掃行馬
之門闥趨宥府之嚴屏摠衣鴟堂鞠躬望履瑟僖令儀
自然休質乃蒙挹損穹崇誨誘卑品欽景風之穆戴冬
日之溫想宗廟之美覲百官之富高大遠密宜容隱度

強記默識秀偉絕倫信可謂君子之宗盟士林之根蒂
也此時不敢以芻言觸聞貴聽私意跋聳慕愛吁已久
矣主上枚卜首東左輔魁柄道協時來陞隆堂高閣下
從容予奪六事百司罔不風從畫一建明鮮不後為律
令內有精思起草之亭外闢欽賢翹材之館庶政準程
公道皁白指蹤武幹範模文場政理赫焉如日正中勲
績浩乎如川方至百度無滯九功可歌不淹歲月而諧
允矣方且興復汴雒恢廓中原有成豈待三載天下孰

不傾心延頸而俟也於皇當陽聖造求理之銳萬方注
賴之切扞患拔艱疇咨良哲必務疾速以副之決斷而
荅之勅天稽衆之訏謨廣士博選之至要不可以不汲
汲也天下之形聲雖婁曠不能周覽遍聞分治而豈無
遺憂流應而豈無遺便惟明鑒大度虛中諏索訪問援
引人之好我弗疑弗猜無怠無斁悉厥胷腹俾來者虛
徐區別以崇其資略甄升以收其器能此納揆之敘也
賢者必表良者必進此天下公議也夫哲謀肅乂公實

要切之規智囊心匠長國家者之所貪也山不讓土故極其高海不擇流以極其深天官地祇有神物主之非徒然也且如多士之中隋管經濟韓白韜鈴威文節制龔黃風化游夏文學研桑心計趙張鉤距或各遐阻不能自達綱目所加裘領既振非所慮矣昔燕昭厚幣以聘郭隗遂致樂毅鄒衍劇辛三傑凡所欲果得所求果成燕以之興蓋似善斯舉真善必來矣似才斯拔真才即至矣先王籲俊無方重使一夫不被以此功利遍物

舉措適當其可數計乎夫未發之機藏伏之符必有能
辨之人瞻前顧後左摩右揣諏度之加詳也晉趙武舉
管庫之士七十家唐崔祐甫除吏八百吾邦何為而不
可乎僕瑣瑣齷齪濫從下大夫之綴自眎聾牙寡合冒
進謁於吾大老之門惟是承前人義方自幼繆纂所學
造夫小者近者幸蒙不拒其庸劣賜之進前他日矇昧
瞽說因事塵獻自效昔者賈誼五十八篇陸贄之文百
數二公究丘旦壺奧係華夏休戚後學之龜鑑致時資

治室隙拾遺誠在夫勉勵稽覈也又頃歲蒙睿訓擢丞
奉常以其志尚有聞區區所尚心志確固綸綍既出必
有所取誠不敢少惰其志也先祖遺訓曰士而無益於
世謂之苟生竊頌斯言未嘗弭忘恭惟閣下宣慈博大
包蓄庶僚膚末不才萬冀無鄙干瀆大鈞戰慄死罪不
宣

雙溪集卷八